

Minister di Husticia y Enseñansa, mr. drs. Arthur Dowers

A expresa elogio y admiracion pa hobennan cu a participa na develo di estatua di Anne Frank

“ESAKI mester marca un comienso pa fomenta y motiva mas tolerancia, respet, norma y balornan den e hobenwnan na nos isla”, Minister di Husticia y Enseñansa, mr. drs. Arthur Dowers a expresa dia-domingo atardi despues di e develo di e estatua di Anne Frank den Wilhelmina Park.

E Minister a expresa admiracion y elogio p’e hobennan cu a participa n’e ceremonia di develo, entre otro Angele Stamper, kende cu a recita un poema riba e topico “libertad interno” cu e hoben mes a skirbi cual tabata inspirador y hopi madura.

El a remarca cu tabata un placer pa wak tanto hoben presente n’e ocasion aki, y cu den transcurso di añanan, aunke Anne Frank a skirbi su diario casi 70 aña pasa, ainda e ta entre e bukinan mas lesa y usa pa examen final di scol secundario na Aruba. Anne Frank ta keda un idolo pa basta di nos hobennan y e ta biba den curazon di hopi, e Minister a bisa.

E mandatario a añadi cu esaki ta algo sumamente positivo como cu Anne Frank a bira un simbolo pa mundo, cu su pensamiento y expresionnan ta recorda e ser humano cu mester reina tolerancia y

amor pa prohimo entre nan pa preveni cu e atrocidadnan cometi durante e di dos guerra mundial nunca mas wordo ripiti.

“Un hende por scoge pa haci bon y un hende por scoge pa haci malo, pero nos mester traha duro pa den e balansa tin hopi mas bon cu tin malo y pa esaki mester inculca norma y balornan, respet pa prohimo y tolerancia den nos hobennan na un edad mas jong”, e Minister a remarca. Mester inculca bon den nan curason pa sigura un bon futuro cu ta positivo y productivo pa nos hobennan, Minister Dowers a conclui.

Annelies Marie “Anne” Frank a nace 12 di juni 1929 y a muri na maart 1945 di tyfus den e campo di concentracion Bergen-Belsen.

E ta un di e victimanan di e holocausto mas conoci y discuti. Su calidad di y talento pa scirbi a resulta den un buki bunita, profundamente emocional y inspirador pa hopi hoben, ora cu su tata cu a sobrebibi e guerra a dicide di publica e diario di Anne pa mundo lesa e experiencianan di su yiu muher durante e ocupacion Aleman di Hulanda durante e di dos guerra mundial.

